



Anthon Frederiksen
Inatsisartunut ilaasortaq, Partii Naleraq

**Inatsisartut suleriaasianni § 37 naapertorlugu apeqqutininut nr. 74-imi Kalaallit
Nunaanni ilagiinnut aamma KNR-imut tunngasunut akissutit**

01-03-2017
Sagsnr. 2017 - 3255
Dok. nr. 4573249

Postboks 1029
3900 Nuuk
Tlf: +299 34 50 00
Fax: +299 32 20 73
Email: ikiin@nanoq.gl
www.nanoq.gl

Asasara Anthon Frederiksen,

Suliassaqarfinnut aamma Naalakkersuisut isiginiagaannut soqutiginninnut qujanaq.

Ilagiit iluanni atorfiit tamakkerlugit inuttalerniarneri ilungersunarsinnaasoq Naalakkersuisut ilisimaarilluarpaat taamaattumillu ataavartumik suliniuteqarfigisarlugit ilungersunarsinnaasut qaangerniarlugit. Apeqqutitit uani ataani akissuteqarfigissavakka. Apeqqutinnut akissutissanut atatillugu biskopeqarfimmit KNR-imiillu paasissutissanik piniarsimavunga.

Apeqqut 1: *Kalaallit Nunatsinni ilagiit kiffartuunneqarnerat pilerinarnerusunngorniarlugu pitsaanerulersinniarlugulu Naalakkersuisut qanoq iliuuseqarpa?*

Akissut: Naalakkersuisut ilagiinnut kalaallinut malittarisassat atuuttut ingerlaavartumik misissortarpaat, Biskopeqarfillu suleqatigalugu nutarterisariaqarnek nalilersortarlugu, aamma nutaanik malittarisassiornissanik pisariaqartitsisoqarnerasoq.

Apeqqut 2: *Sooq-una ilagiit sinniisaasa ataatsimiinnersiutaat aatsaat ataatsimiinnermi imaqarniliap akuerineqareerneqarneratigut aatsaat tunniunneqarsinnaasut?*

Akissut: Qitiusumiit piumasaqaataangilaq (naalakkersuisoqarfimmiit imaluunniit biskopeqarfimmiit) ilagiit sinniisaasa ataatsimiinneriniit imaqarniliat akuerineqarsimanissaat, ataatsimiinnersiutinik akiliisoqannginnerani. Provsteqarfimmi aalajangersimasumi tamanna atuussimappat imaassinnaavoq imaqarniliap akuersissutigineqartup uppernarsartaraa kikkut najuussimanersut, taamalu ataatsimiinnersiutinik pisinnaanersut. Taamatut piumasaqaataasinnaasoq provsteqarfimmi aalajangerneqartarpoq.

Apeqquut 3: *Sooq-una ilagiit sinniissaasa ukiumut taamaallaat sisamariaannarlutik ataatsimiinneri kisimik akilerneqartartut?*

Akissut: *Provsteqarfinni ataatsimiititaliani ilagiillu sinniisaanni ilaasortanut qinikkanut ullormusianik, angalanermi ineqarnermilu iluarsiiisutininik kiisalu sulinermit isertitassaraluanik annaasanut taartisiassanik tunniussisarneq pillugu Namminersornerullutik Oqartussat nalunaarutaat nr. 32, 17. december 1996-imeersumi § 2 naapertorlugu taamaallaat taamatut annertussusilinnik akiliisoqarsinnaavoq.*

Aalajangersagaq imaappoq:

§ 2. Ilagiit sinniissaasa ataatsimiinnerini peqataanernut ataatsimiinnersiuteqartitsisoqartarpoq. Ataatsimiinnernut akunnerit sisamat sinnerlugit sivissusilinnut tunngaviumik aningaasat 166,00 kr.-it tunniunneqartarput. Ataatsimiinnernut akunnerit sisamat ataallugit sivissusilinnut ullormusiat ataatsimiinnersiutit affaat tunniunneqartarput. Qaammatisiutilli malillugit ukiut tamaasa ilagiit sinniisaanni tamani amerlanerpaamik ataatsimiinnernut marlunnut akunnerit sisamat qaangerlugit sivissusilinnut ataatsimiinnernulluunniit sisamanut akunnerit sisamat ataallugit sivissusilinnut ataatsimiinnersiuteqartitsisoqartarpoq. Imm. 2. Provsteqarfinni ataatsimiititaliani ataatsimiinnerni peqataanernut ataatsimiinnerup sivissusia apeqquataatinagu ataatsimiinnermut ataatsimut tunngaviumik aningaasanik 332,00 kr.-inik ataatsimiinnersiaqartitsisoqassaaq. Imm. 3. Imm. 1 aamma 2-mi taaneqartut saniatigut ilagiit ataatsimiinnerinut atatillugu Kultureqarnermut, Ilinniartitaanermut Ilageeqarnermullu Pisortaqarfimmit siumoortumik akuersissuteqarneratigut ataatsimiinnerit suussusii naapertorlugit ataatsimiinnersiaqartitsisoqassaaq.

Apeqquut 4: *Ilagiit sinniissaasa ataatsimiinnersiutaasa allanngortinneqarnissaat Naalakkersuisunit pilersaarutigineqarjaa? akissut akuersaarneqarpat, qanoq? akuersaarneqanngippallu sooq?*

Akissut: *Naalakkersuisut biskoppeqarfik suleqatigalugu pitsannguutaasinnaasunik periarfissaqarnersoq misissorniarpaat. Biskopeqarfiup ilisimatitsissutigisinnaavaa ukiuni kingullerni tallimani immikkut akuersissuteqartoqarnissaanik qinnuteqaatinik tigusaqartoqartarsimanngitsoq, Provsteqarfinni ataatsimiititaliani ilagiillu sinniisaanni ilaasortanut qinikkanut ullormusianik, angalanermi ineqarnermilu iluarsiiisutininik kiisalu sulinermit isertitassaraluanik annaasanut taartisiassanik tunniussisarneq pillugu Namminersornerullutik Oqartussat nalunaarutaat nr. 32, 17. december 1996-imeersumi § 2, imm. 3 naapertorlugu.*

Aningaasat nalunaarummi annertussutsit nalunaarneqartut ukiumoortumik iluarsiiisuteqarfiusarput.

Apeqquut 5: Palasit ilinniarsimasut ilaat sooq atorfinitsikkumaneqanngillat?

Akissut: Sumiiffinni sumiittuniluunniit palasimik atorfinitsitsinissamik itigartitsisoqarsimangilaq. Palasi malittarisassat atuuttut naapertorlugit sumiiffimmi ilagiit sinniisaannit toqqarneqassaaq, biskopimullu inassutigineqarluni. Tamatuma kingorna pineqartoq toqqarneqartoq Naalakkersuisunut atorfinitsinneqassaaq.

Apeqquut 6: Ataatsimiititaliap "provstiudvalg"-imik taaneqartartut atuutilerseqqinneqarsinnaanera Naalakkersuisut qanoq isumaqarfigaat?

Akissut: Ilageeqarneq pillugu Inatsisartut inatsisaat nr. 9, 19. maj 2010-meersoq Inatsisartuni isumaqatigiittuni akuersissutigineqarpoq, tassuunalu aamma aalajangerneqarpoq provstiudvalg-iit atorunnaarnissaat. Aalajangerneq ilaatigut tunngaveqartinneqarpoq Oqaluffiup siunissami aqunneqarnissaanut aaqqissuuneqarnissaanullu nassuiaasiamik (UKA 2007/53). Tassani isummerfigineqarpoq provstiudvalg-it atorunnaarsinneqarneri allaffissornermi aamma aningaasatigut susasaqartunut sipaarutaassasoq. Tamatumunngalu atatillugu siunnersuut ilagiinni atorfilinni aamma soqutigisaqartuni tusarniaassutigineqarpoq, ataatsimullu isigaluni isumaqatigiissutaalluni ataatsimiititaliat atorunnaarsinnissaat.

Tunngavilersuutillu ilaatigut tassaapput pissutsit atuuttuusut imaammata, palasi aamma provsti ulluinnarni allaffissornermi suliassanik isumaginnittooreersut, aamma aningaasartuutissanut missingersuutitut siunnersuusiasut ilagiit sinniisaasa palasit qanimut suleqatigalugit sularisaat qaqutigunnaq provstiudvalg-iimi ataatsimiinnerni allanngortinneqartartut. Taamaattumillu paasiniaavigineqartuni amerlanerni provstiudvalgit pisariaqanngitsutut aningaasartuutaasutullu oqaasigineqarlutik.

Naalakkersuisut isumaqanngillat provstiudvalg-iit atorunnaarsinneqarnerisa kingorna ilagiit aaqqissuussaanneranni allannguuteqartoqarsimasoq ataatsimiititaliat pineqartut pilerseqqinneqarnissaanut tunngaviusinnaasunik.

Apeqquut 7: Sooq-una oqaluffinni pattattussanik ilinniartitsinermi nuutersorsinnaaneq piumasaqaataasoq?

Akissut: Piffissami maanna atuuttumi nuutersorsinnaaneq piumasaqaataavoq ilinniartitaaneq aningaasalersugaammat ilinniartussanik immikkut piginnaaneqareersunik naammassinnissinnaasunik aallaaveqartumik ingerlassaalluni. Nuutiniq tunngaviusunik ilinniarnissaq ilinniakkap ilagissappagu, ilinniartitaaneq tannerusariaqassaaq. Naalakkersuisut Biskopi oqaloqatiginiarpaat ilinniartitaanermik aaqqissuussisoqarsinnaanersoq, nuutiniq atuarsinnaanermik ilaqartumik, kiisalu taamatut allannguinerup aningaasatigut kingunerisinnaasai qulaajarniarlugit.

Biskopillu 2017-imiit organistinut tunngaviumik pikkorissarneq sap. ak. sivirususilik ammarsimavaa, soqutiginnittunik nuutsersornermik ilisimasaqanngikkaluartunit qinnuteqarfigineqarsinnaasoq, misileeqqaarnertut isigineqarsinnaasumik, organistimut ilinniartitaanermut piareersaatitut tiguneqarsinnaasumik.

Apeqqut 8: *Sooq-una ajoqit oqaluffimmi pattattuujutigisinnaanngitsut?*

Akissut: Ajoqi aamma organisti aalajangersimasumik atorfinitsitaasoq sap. ak. nal. ak. 20-ini sulisussatut atorfinitsitaasarput. Ilagiinnut atatillugu oqaluffimmi atorfeqarneq ajoqitut imaluunniit pattattutut atorfeqarfiusarpoq. Atorfiup aappa ilagiinni kiffartuussisussatut atorfiuvoq immikkut ataqqinartumik pissusilersortussaannermik piumasaqaatitaqartoq, annertusisamik tusakkanik nipangiussisussaataitanermik imaqartoq, immikkullu uppersaasussatut pinerluttulerinermut inatsimmi illersugaasoq.

Naalackersuisut aamma Biskopip allaffeqarfiata paasinninneraat ajoqitut pattattutullu akissarsiaqartoqarsinnaanngitsaq, taamalu marlunnik atorfeqartoqarsinnaanngitsaq, ajoqitut sulinissamut paasinninnermut tamanna naapertuutinngimmat.

Siuliani eqqaaneqartutut ataatsikkut atorfiit marluk tigummineqarsinnaanngillat, kisiannili ajoqitut aalajangersimasumik atorfilik pattattutut paarlattaasutut nal. ak. akissarsialerneqarsinnaavoq, soorluttaaq pattattoq aalajangersimasumik atorfeqartoq ajoqitut paarlattaasutut akissarsisinneqartarsinnaasoq.

Ajoqitut pattattunulluunniit atorfiit ataatsikkut tigummineqarsinnaanerat akissarsiaqartitsisarnermut periarfissaqarnermaq Naalackersuisut misissorniarpaat. Ilanngullugulu nalilissallugu siornatigut periuusaasimasooq marloqiusamik akissarsiaqartitaasarsimaneq eqqunneqarqissinnaanersooq.

Apeqqut 9: *Ajoqissanik ilinniartitsinermut atatillugu, ajoqissat piumasut pattattutut ilinniartinneqarsinnaanerat periarfissaasinnaavaa?*

Akissut: Biskopeqarfiup ilisimatitsissutigaa piffissap nukissallu eqqarsaatigalugu naatsorsuutigineqarsinnaanngitsooq ajoqissanik ilinniartitsinermi organit ilanngunneqarsinnaaneri.

Apeqqut 10: *Aningaasat ilagiit sinniisaannit qinnutigineqarsinnaasut (diagonimidler)-nik taaneqartartut qaqugukkut ilagiit sinniisaannit qinnutigineqarsinnaappat? aamma sunut atorneqarsinnaasutut qinnutigineqarsinnaappat?*

Akissut: Ingerlaavartumik aningaasaliissutinik qinnuteqartoqarsinnaavoq. 2017-imi biskopip suliami tassani 400.000 kr.-it immikkoortissimavai.

Siunertanut qanoq ittunut qinnuteqartoqarsinnaanersoq ersarinnerusumik allaaserineqarpoq biskopeqarfiup december 2016-imi saqqummersitaani: “Diakoni – atugassat pitsaasut evangiiliup oqaluussissutigineqartarnerani. Ilagiinni isumaginninnikkut namminerlu piumassutsimik sulinermi qiimmassaat”. Aallaavittut tassani pineqarput ilagiinni sumiiffinni tamarmiusuni isumaginninnikkut sullissineq.

Apeqquut 11: *Ilagiit sinniisaasa 2017-imi isumasioqatigiisinneqarnissaat qaqugu pissasoq Naalakkersuisut naatsorsuutigaat?*

Akissut: Naalakkersuisut biskopeqarfimmik oqaloqateqarneq aallartinniarpaat ilagiit sinniisaasa katersuutsinnissaat pillugu.

Apeqquut 12: *Biskop-imik, provst-inillu toqqaasarnerit pillugit aaliangersakkanik allannguisinnaanermik Naalakkersuisut takorluuisinnaappaat?*

Akissut: Naalakkersuisut maanna pilersaaruteqanngillat isumaliuteqartillugu biskopimut provstinullu tunngatillugu.

Apeqquut 13: *Ullaakkut knr-ikkut bibilimik atuaalluni eqqarsaatissiisarnerit siusinnerusukkutuut atuutilerseqqinneqarnissaat Naalakkersuisut qanoq isumaqarfigaat?*

Akissut: Naalakkersuisut biskopimiit paasivaat palasit ilagiinniillu oqariartuutit ersersittaraat tamanit kissaataasoq biibilimik atuaasarnerit ullaakkut eqqutseqqinneqartariaqartut.

Naalakkersuisut aalajangersinnaanngilaat KNR-imi suut aallakaatinneqartassanersut.

Naalakkersuisoqarfiup apeqquummut tassunga atatillugu KNR paasiniaavigisimavaa, aallakaatitat pineqartutut ittut siunissami aallakaatitassanik pilersaarusiornermi ilanngunneqassamaarnersut, aammalu aallakaatitat pineqartutut ittut naalaartartunik isumasiuisarnerni ilanngunneqartarsimanersut, allatulluunniit sammineqartarsimanersut pillugit.

KNR-ip akissutigaa piffissami matumani pilersaarutaanngitsoq biibilimik atuaanermik tassalu sapaatip akunneranut pingasoriarluni minutsini tallimani aallakaatitsisarsimaneq eqquteqqinneqassamaanngitsoq.

Taarsiullugu sapaatip akunneranut aallakaatitaaq Puilasooq eqqunneqarsimavoq, biibilimit atuaanerinnaanngitsoq, kisiannili allassimasut atuarneqartut palasimit, biskopimit assigisaannilluunniit oqaluuserineqarnerannik ilaqartumik aallakaatitsisoqartarluni. Taamatullu tussuutit atorneqartussat aamma sooq atorneqarnissaat pulaartup eqqartortarlugu. Taamaasilluni KNR-ip upperisaq inuunerlu tullerriaarnermini ilaatippai, sammisat qaammarsaavigisarnersigut

oqallisigisarnerisigullu, immikkut ilisimasalinnit naalaartunillu ingerlanneqartartunik.

Ilanngullugulu eqqaaneqarpoq sapaatit tamaasa nalliuttunilu naalagiarunik nunatsinni illoqarfinit assigiinngitsuniit aallakaatitsisoqartartoq.

KNR-ip isiginnaartartunik naalaartartunillu misissuiffiginnittarnerini erserpoq biibilimik atuaanerit naalaartartunit 56-iniit qummut ukiulinnit soqutigineqarnerusartut, taakkualu nunatsinni innuttaasut 7 %-eraat. Inuusunnerpaat akornanni biibilimik atuaaneq soqutigineqanngilaq imaluunniit annikitsuaraannarmik soqutigineqarluni.

Apeqqut 14: *Knr-ikkut inatsisartut toqqaannartumik ataatsimiittarnerisa aallakaateqqinneqatalernissaat Naalackersuisunit sulissutigineqarpaa?*

Akissut: Innersuunneqassaaq Naalackersuisut aalajangersinnaanngimmassuk KNR-imi suut aallakaatinneqartarnissaat.

Naalackersuisoqarfilli KNR-imut paasiniaasimavoq Inatsisartut ataatsimiittarneri siunissamut sammisumik aallakaatitassanik pilersaarusiornerni ilaanersut pillugu, imaluunniit teknikkkut qanoq ittunik periarfissaqarnerisooq ataatsimiinnerit immikkut aallakaatitarnissaannut. Kiisalu aallakaatitat taamaattut naalaartartunik misissuisarneri ilaasarnersut.

KNR akivoq ingerlaavartumik oqaluuserineqartartoq Inatsisartut ataatsimiinneri radiukkuq toqqaannartumik aallakaatinneqartassannginnersut, kisiannili toqqaannartumik aallakaatitsisinnaaneq qinerneqarsimanngitsoq, unammilligassat marluk pissutigalugit:

1) Piffissaq ataatsimiiffiusartooq nal. 10:00-miit 14:00-imut nuunneqarsimammat, aamma

2) Innuttaasunik kiffartuussinissamut isumaqatigiisummi piumasaqaatit, ukiumut nal. ak. qassit aamma sammisassat assigiinngitsut.

KNR radio-p nalilersimavaa minnerpaamik nal. ak. 300 ukiumut "annaaneqassasut", Inatsisartut piffissaq ataatsimiittarfiat nutaaq tunngavigalugu toqqaannartumik aallakaatitsisassagunik. KNR radio ullumikkut aallakaatitassanik nutaanik sapaatip akunnerisa ulluini tamani 11 tiimit aallakaatitsisalernikuvoq. Tamanna allanngortinneqassappat KNR-ip anguniagaq pingarneq taanna naammassiuminaatissavaa.

Kiisalu Inatsisartuniit aallakkaatitsineq nalunaaquttap akunneri tamaasa radiuaviisimit unitsinneqartassaaq, kiisalu ullup qeqqanut sivisunerusumik, takinerusunik radiuaviiseqarnerani, silassap atuarneqarnerani aamma nalunaarutit atuarneqarneranni.

Ullumikkut Inatsisartut ataatsimiinneri toqqaannartumik KNR2-mi aallakaatinneqartarput, oqallinnerillu tusaallugillu isiginnaarneqarsinnaallutik kalaallisut aamma danskisut, soorluttaaq KNR-ip quppersakkamini Inatsisartut quppersagaannut link-imik inissiisimasoq, ataatsimiinnerit toqqaannartumik mobil-imi imaluunniit qarasaasiami tiguneqarsinnaatillugit. Teknologiilu nutaaq iluaqutigalugu ullumikkut siunissamilu sulii annertuneruartaartumik innuttaasut assigiinngitsukkaat kissaataat naammassineqartarsinnaassapput, soorlu assersuutigalugu utoqqarnut radio, nipilersukkat, meeqqanut inuusuttuaqqanullu kanal-it il.il.

KNR-ip Tele attavigereersimavaa teknikikkut periarfissat nutaat pillugit. FM-imi kanali nutaaq 2015-imi missiliuunneqarpoq 18 mio. kr.-it missaannik akeqartussatut. TELE-p kingornagut nalunaarutigaa tamanna kissaataassappat siusinnerpaamik 2018-imi suliaq aallartinneqarsinnaasoq.

KNR-ip naalaartartunik misissuinikkut siusinnerusukkat paasisimavaa ikittuinnarnit Inatsisartuni oqallinnerit malinnaavigineqartartut, taakkualu inuusuttortaqaqngingajattut. Naalaartartut misissuivigineqarneranni marsimi naammassisussatut naatsorsuutigineqartumi naalaartartut toqqaannartumik aperineqarput KNR-ip ulluunerani programmia Inatsisartut ataatsimiinnerini matoqqasassappat tamanna qanoq isumaqarfigineqarnerasoq pillugu.

Inussiarnersumik inuulluaqqusilluta



Doris Jakobsen